

Il patriziat dal temp da la Veglia Republica

Las famiglias dominantas en survista, part 2

De Lumbrein [Lumerins, Lumbrins]

Impurtanta schlatta da ministerials grischuns durant il temp medieval e famiglia da magistrats en il temp da furmaziun e svilup da las Trais Lias e da la Republica. La tur Casti, situada al cunfin meridiunal da la vischnanca da Lumbrein, ha servì a la famiglia a l'entschatta da residenza. Il 1231 cumpara Henricus de Lumarins sco perditga da la claustra da S. Gliezi/Cuira. En il 13avel tschientaner eran ils Lumbrein parentads cun la famiglia Torre da la Val dal Blegn. Konrad è stà avat da Mustér dal 1239–47. Sco perditgas en la Val dal Rain Anteriu ed en la Val dal Blegn èn attestads il 1281 Albertus ed il 1298 Burchardus e Redulfus de Lumbrein. Tranter il 1371 ed il 1511 èn ils Lumbrein stads chastellans episcopals en Lumnezia. In advocatus de Lumerins figurescha il 1377 sco chastellan sur tut ils subdits episcopals da la Val dal Rain Anteriu (Muntinen) al lieu da dretgira da Sagogn. En ils onns 1410 disponivan ils Lumbrein da dretgs sur ils chastels da Rapertg e da Baldenstein en la Tumleastga. Lur influenza politica ha cuntanschi sia culminaziun il 1429, cura ch'els han cumprà dals Werdenbergs il chastè ed il signuradi da Löwenberg ch'els han possess fin tranter il 1481 ed il 1489. Quest acquist ha rinforzà lur posiziun entaifer la Lia Grischa, en la quala els han mess plirs landrehters, l'emprim da quels Hans de Lumbrein che cumpara gia a chaschun dal sarament da la Lia Grischa il 1424 a Trun. Il chapitani Benedetg, landrehter dal 1451–52, ha sigillà ils 2 da matg 1451 l'alleanza d'amicizia cun l'Engiadina ed il 1471, en segunda posiziun suenter l'avat da Mustér, quella cun la Lia da las Diesch Dretgiras. Ses figl Hans Lombris è stà landrehter dal 1484–85, nov onns chastellan sco era bandierel da la Lumnezia dal 1491–99. El ha sigillà il 1497 il patg cun ils Set Lieus confederads ed è stà in dals chapitanis a la Chalavaina (1499), nua ch'el ha cumandà, ensemen cun Wilhelm Rink, la colonna ch'ha tschinclà a moda decisiva l'adversari. Ils Lumbrein han consolidà lur posiziun cun s'alliar tras maridaglia cun las famiglias Capaul, Mont, Valendas, Fontana e Planta. Suenter il 1500 han els succumbì en lur rivalità permanenta definitivamain als de Mont da Vella, als quals els avevan cedi gia pli baud il signuradi da Löwenberg. La tur a Lumbrein è ida als Capauls. Suenter il 1511 n'han ils Lumbrein betg pli occupà uffizis d'impurtanza. Perquai ch'els n'avevan betg prendi part al servetsch ester, n'han els betg pudì cumpeter materialmain (grazia a pensiuns) cun las autras famiglias. Da la lingia dals Lumbrein da la Lumnezia, ch'era sa domiciliada via Glion enturn il 1450 a Trun e Zignau, èn descendids Hug, Conrad e Gaudenz, tuts trais landrehters da la Lia Grischa. Las actualas famiglias Lombris e Lombriser derivan probablamain dal rom da Trun.

Martin Buidi

De Mont [Demont]

La schlatta originara da Vella, vasals da l'uestg da Cuira, è stada dal 1481/89–1551 e puspè a partir dal 1595 proprietaria dal chastè e dal signuradi da Löwenberg a Schluen. Fin il 1793 han ils Mont mess 15 landrehters (chaus) da la Lia Grischa, han occupà uffizis en las Terras subditas (Vuclina, Clavenna e Buorm), èn stads uffiziers en servetsch franzos ed han mess divers dignitaris en il chapitelatedral sco era, cun Ulrich, l'emprim prinzi-uestg da Cuira oriund da la Lia Grischa (1661–92). A partir da ca. il 1670 èn els stads truces (seneschals) da l'uestg da Cuira.

Il 1308 è menziunà in Burkhard a Sumvitg ed en ils onns 1354–84 in chavalier Ulrich a Cuira. I n'è betg segir, sch'igl han existì lioms da parentella cun Heinrich, atte-



Vopna da Hans de Lumbrein, l'emprim landrehter da la Lia Grischa, en la Cuort Ligia Grischa a Trun.

stà a Vella a partir dal 1372; Burkhard (menziunà il 1408–39), Rudolf (documentà il 1408–26) e Wilhelm (attestà il 1408–35), ses figls, han schendrà trais roms da la famiglia. En il 15avel e 16avel tschientaner èn ils Mont stads landrehters e diplomats: Gilli – ses figl Michael è stà cancellier dal 1502–24 e burgamester da Cuira il 1521 e 1523 – ils frars Gallus e Hans ed a l'entschatta dal 17avel tschientaner Luzius. Ferdinand, il figl da Gallus, è stà prevost dal chapitelatedral da Cuira 1597–1607. Gallus ha fatg carriera militar en servetschs spagnols, è stà mastral da la Lumnezia e landrehter da la Lia Grischa ed ha occupà divers uffizis en las Terras subditas. Il chavalier Johann ha cumandà ina cumpagnia da guardia, numnada tenor el, en servetsch da la Frantscha (1620–35) ed è stà litinen colonel en il regiment Schauenstein, ses frar Melchior († 1661, baron de Löwenberg) ha servì sco chapitani en il medem regiment dal 1642–58; il biadi da quel, Melchior, ha obtegni il medem grad. En il 18avel tschientaner han numerus rappresentants da la famiglia servì a la Frantscha, per exempel Peter Anton. Suenter la Battaglia d'Austerlitz (1805) ha Joseph Laurent survegni il grad d'in general da divisiun franzos. En il 19avel tschientaner han ils Mont pers lur impurtanza politica e militar.

Ursus Brunold

[De] Capol [Capaul]

Schlatta da Flem passada en il 15avel tschientaner dal stan da purs libers al status da members da l'elita aristocratica da la Lia Grischa. Ils Capol stattan probablamain en il center da l'antica legenda da Flem «Gion Paul da Flem stai si». Il 1410 è menziunà a Flem in bain puril de Capaul. L'emprim exponent attestà da la famiglia è Paul der junger, president communal da Flem il 1427; il 1454 (e 1458?)

era Ott Paul der älterter chau da la Lia Grischa. La famiglia è s'enritgida probablamain tras il commerzi da muvel; ella occupava uffizis ministerials episcopals ed administrativs en Surselva sco era uffizis locals e statals en la Lia Grischa (Daniel, Johann Gaudenz). Il 1483 purtavan ils Capol il titel da giuncher. Gia il 1458 ed il 1460 residivavan e possedeavan roms da la famiglia Capol bains a Glion ed a Trun. Hertli aveva cumprà terren ed uffizis en Lumnezia; il 1489 aveva el obtegni da l'imperatur la brev da noblezza ed aveva guidà las truppas grischunas en la Guerra da Chalavaina (1499). Cumandants da truppas grischunas èn era stads Hertli (figl da Hertli) en la conquista da la Vuclina (1512) e Hans en la Segunda Guerra da Müsch (1531). Ils Capol eran arrivads a bainstanz tranter auter grazia a lur activitads militaras a l'ester, l'emprim en servetsch da Milaun e da l'Austria, alura en servetsch da la Frantscha, da Vaniescha e da l'Olanda (Hercules); dasperas avevan els fatg fortuna tras maridaglias lucrativas ed in prudent commerzi da compra e da barat. Uschia avevan acquistà per exempel Hans il 1529 la mesadad da l'Antistitium a Cuira da l'avat da Mustér e Luzi il 1533 la chasa Planaterra. Martin, in dals cumandants principals en la campagna militar a Siena († 1554) e consort da Sophya Salganser (probablamain figlia illegitima dal cont Jörg von Werdenberg-Sargans), possedeava il 1546 gronds bains a Giuvaulta. Plirs rappresentants da la famiglia Capol èn stads ambassaders da las Trais Lias e derschaders, tranter quels Hercules e Johann Gaudenz. Ott, iniziand da la lescha d'ierta (1457), Wolf, fundatur da la pravenda evangelica (1528) e Raget, protagonist en la liberaziun da las dieschmas e dals tschains da la claustra da Faveras (1574), èn sa fatgs valair en servetsch da lur vi-

schnanca burgaisa da Flem. Plirs members da la famiglia Capol han frequentà universitads europeicas, per exempel Caspar. Ils Capol èn era stads protecturs da la minorità reformada en Surselva. Quatter chasas dals Capol a Flem dattan anc perditga da lur operar, tranter auter l'odiern Hotel Bellevue (construi il 1577 da Raget) ed il Schlössli (construi il 1682 da Johann Gaudenz). Dal 15avel–18avel tschientaner ha la famiglia Capol giugà ina rolla decisiva en la vita publica dal Grischun. (red.)

[De, von] Castelmur

Schlatta da ministerials ed aristocrats oriunda da la Bergiaglia. Ils de Castelmur derivan eventualmain dals de Vicosoprano, attestads dal 1096–1304. Albertus de Castello Muro, documentà per l'emprima giada il 1190, regneva en feud da l'uestg da Cuira la fortezza da Castelmur. Il 1186 vegn menziunà Gaudentiu[s] de Castromuro ch'ins considerescha sco il progenitur da la famiglia. Sco ministerials episcopals han ils Castelmur negozià e sigillà plirs contracts. Els possedeavan numerus feuds en Bergiaglia ed a partir dal 13avel tschientaner han els disponi d'ina fossa en la catedrala da Cuira; il medem temp èn els stads ministerials da l'abazia benedictina da Faveras. La divisiun da la famiglia en dus roms principals, ils Scolarens ed ils Manus, è succedida en il 13avel tschientaner, ma l'appartegnientscha dals singuls members a l'in u a l'auter rom n'è betg adina clera. Il 1319 ha inizià Jacobus, figl da Tobias, ina lunga seria da notars da la famiglia Castelmur, activs en Bergiaglia. Quest'actività ha permess ad els da surviver las aspiraziuns da la val en las pli autas posiziuns e d'occupar repetidamain l'uffizi da mastral da la Bergiaglia. Grazia al notariat, cumbinà cun maridaglias calculadas, èn ils Castelmur sa sviluppad da simpels vasals episcopals ad ina famiglia aristocratica dominante en la Lia da la Chadé.

Da la lètg dad Albert cun Elisabeth Baff da Farschno e naschì il rom da la Tumleastga. Il figl Rudolf è stà avugà episcopal da Farschno 1413–28, suandà da Schwiggli 1429, Rudolf 1470–71, Joachim 1473–91, Jacob 1524–26 e Gaudenz 1528–37 e 1540–42. Durant la Guerra svabaisa (1499) è Joachim stà in dals trais regents da l'uestg da Cuira; ses figl Gaudenz è stà proprietari dal chastè da Girsberg/TG (1525–33) ed ha sigillà l'emprima Pasch da Kappel. Joachim e Gaudenz han maridà dunnas da la famiglia Humpis, ina dinastia da martgadants da Ravensburg (Svevia Superiura). La sora da Gaudenz è stada abadessa da la claustra da Müstair 1510–34. Schwiggli ha occupà l'uffizi da chastellan da Strassberg 1437–48, entant che Jacob ha obtegni en pegn il chastè da Rapertg. Ils Castelmur quintavan divers canonis, tranter ils quals Bartholomäus. En il 15avel tschientaner è cumpari il rom dals Stecker-Corn-Menusi ch'ha schendrà numerus diplomats en servetsch dal Grischun sco era podestats e titulars d'uffizis en Vuclina; quest rom è stà l'unic ad aderir a la reformaziun. Vers la fin dal 16avel tschientaner è l'influenza dals Castelmur sa diminuida rapidamain en la Lia da la Chadé. Suenter in conflict cun ils Salis, prorut enturn il 1560, è s'indeblida era lur posiziun politica en la Bergiaglia. Tscherts roms èn s'extinguids, auters èn emigrads: Jacob Corn von Castelmur ha fundà il rom viennais a l'entschatta dal 17avel tschientaner, entant ch'in auter rom ha fatg cun Giovanni fortuna a Marsiglia. En Svizra vivan anc ils roms da Stampa e da Tumejl.

Paul Eugen Grimm

Prevost

Famiglia aristocratica da Visavraun. Il num Prevost provegn dal latin praepositus (tudestg Ammann, Meier) e cumpara oz sco Prevosti. Gia en il 12avel tschientaner era domiciliada la famiglia da ministerials da l'uestg da Cuira a Visavraun. L'emprim exponent da la famiglia attestà il 1190 è Johannes à Praepositus. La famiglia Prevost ha

mess en la Bergiaglia Soprporta numerus notars, solitamain cun autorità imperiala; quels eran fitg stimads ed occupavan savens l'uffizi da podestat, era suenter che l'influenza da l'uestg era sa sminuida considerablamain en la Bergiaglia en il 15avel tschientaner. Il 1367 è documentà a l'occaziun da la fundaziun da la Lia da la Chadé il podestat Ulrich Propst (la versiun tudestga da Prevost). La famiglia possedeava numerus feuds episcopals en la Bergiaglia e singuls feuds a Beiva ed a Ftan. En il 15avel e 16avel tschientaner appartegneva ella, sper las famiglias Castelmur e von Stampa, a las schlattas aristocraticas da la Bergiaglia Soprporta. Rudolf ha promovì a Bologna al dr. iur. ed è stà là rector da l'università. Il 1517–25 ed il 1531–37 ha el occupà l'uffizi da vicari en Vuclina. En il 16avel e 17avel tschientaner fascheva la famiglia era commerzi da saida a Turitg e Basilea ed occupava en la Bergiaglia, en l'Engiadina ed en la Val Schons divers uffizis politics, giudizials e militar. Lingias da la famiglia èn sa domiciliadas en la Tumleastga, a Cuira ed en la Val Müstair. Da la davosa lingia deriva l'avat da Mustér Benedikt. Il 1552 ha il chapitani Scher obtegni il titel da chavalier da l'imperatur Carl V; dapi alura definiva la famiglia sia derivanza dals Fribians (schlatta aristocratica romana). Il 1618 è vegni executà a Tusaun Johann Baptista.

Paul Eugen Grimm

[A, von] Stampa

Schlatta da la noblezza bassa dal chapitelatedral da Cuira e famiglia aristocratica residente en Bergiaglia, immigrada da Grave-dona sper Com en il 13avel tschientaner e domiciliada a Visavraun, a partir dal 15avel tschientaner a Stampa. A Cuira è attestà per l'emprima giada il 1321 in Bartholome. Hans ha signà il contract da fundaziun da la Lia da la Chadé il 1367. Dal temp medieval tardiv fin viaden il 1550 han ils Stampa occupà, sco ils Castelmur e Prevosts, sper ils Salis l'uffizi dal podestat da la Bergiaglia (total 16 giadas tranter il 1401 ed il 1500) ed han cuntanschi ina posiziun dominante en la val. Dasperas èn els era stads activs sco notars. A partir da la mesadad dal 16avel tschientaner èn els stads, sco il rest da l'elita en Bergiaglia, en la sumbriva dals Salis influents. A l'exteriur da la Bergiaglia cumparan els sporadicamain en uffizis episcopals, per exempel Anton sco chastellan dal Surses a Riom 1409–19.

Ils Stampa, participads al transit da martganzia tras la Bergiaglia cun possess da la duana locala sco feud episcopal, disponivan da ritgezras remartgablas enturn il 1500 ed eran s'integrads en l'elita da las Trais Lias. Al punct culminant da lur pusanza han els surpiglià il 1553 en pegn il feud austriac dal chastè e dal signuradi da Razén ch'è dentant passà gia il 1558 als Plantas. En il 16avel tschientaner han ils Stampa occupà repetidamain auts uffizis en Vuclina, per exempel era quel dal guvernatur il 1515 ed il 1579. Il colonel Bartholome ha cumandà truppas grischunas a la conquista da la Vuclina e Johannes ha tractà sco mess grischun cun Milaun il 1532 (Segunda Guerra da Müsch). Ina lingia dals Stampa è sa domiciliada a Cuira (cun in rom a Farschno) ed è s'extinguida il 1759. Ils exponents da quella han gi plitost in impurtanza locala, per exempel sco chastellans episcopals a Farschno. Ulteriurs roms da la famiglia cumparan a Bergam e Lindau.

Peter Conradin von Planta

Lexicon Istoric Retic

Il LIR cumpiglia bundant 3100 artgels (geografics, tematics, artgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.